

plusieurs Isles. De ce port iusques à l'Isle sainte Catherine, on compte six lieues, laquelle est en mesme eslevation: comme aussi est la Baye Royal, & la riuiere de Fale distante de laditte isle d'une lieue ou environ: entre lesquelles se voyent plusieurs Isles pres de la coste. De là vous venez à la riuiere des Vases à laquelle comman-
Riuiere des Vases, & la mare.
doit ce grand Roy Quoniambec, duquel ailleurs ie vous ay parlé, & qui gist à trois cens trente six degrez de longitude, & a vingt cinq degrez de latitude: à douze lieues de là se trouue la riuiere de saint Vincent, gisant en mesme eslevation que la susdite. Puis se presente à dix lieues loing ou environ, la pointe de bon Abrit, au deuant de laquelle est posée vne Isle peuplée d'oyseaux seulement, & de quelques peuples Sauvages qui vont à la pescherie, & gist sur les trois cens quarante degrez de longitude, vingt & quatre degrez trente minutes de latitude. La grande riuiere de l'Anaire, de la France Antarctique, est distante de la susdite pointe, de trente deux lieues ou environ: & est directement posée sous le Tropique de Capricorne, suivant l'observation que j'en ay faite estant sur les lieux: & gist sur les trois cens quarante deux degrez de longitude, vingt & trois degrez trente minutes de latitude. De ce lieu vous venez à voile desployée au cap de Frie, distant d'icelle riuiere quelques vingt & huit lieues. Ce fut là où nous pensions faire vn fort: & gist à trois
Cap de Frie & des Basses.
cens quarante quatre degrez quarante minutes de longitude: vingt vng degrez quarante deux minutes de latitude. Sillonnant tousiours la mesme coste, si le vent vous est contraire vous gaignez la riuiere de saint Sebastien, qui est à quatorze lieues du mesme Cap, & est posée sur les trois cens quarante cinq degrez quinze minutes de longitude, & vingt deux degrez trente minutes de latitude. Puis prenez la route du Cap de Basses, au deuant duquel se presentent plusieurs rochers qui font vne pointe en forme de langue de bœuf, qui entre quarante lieues en mer, contre lesquels l'an mil cinq cens cinquante & trois, se perdirent deux Carauelles de Portugais: & gist ce Cap à trois cens quarante sept degrez vingt minutes de longitude, & vingt degrez de latitude. Au deuant duquel se voyent à l'Est l'Isle de l'Ascension, (qui n'est peuplée que d'oyseaux, & vermine) & celles de la Trinité, & de sainte Marie, qui luy sont opposites. A trente lieues d'iceluy est la riuiere saint Augustin, en pareille eslevation: & de laquelle vous venez au goulfe de tous les Saints, l'un des larges, & fertilz en toute sorte de poisson qui soit en ceste coste, distant de la susdite riuiere de trente sept lieues: & gist à trois quarante huit degrez de longitude, treize degrez trente minutes de latitude. De ce lieu vous venez à Port Real,
Port Real ou les François prennent le Bresil.
distant de ce goulfe de douze lieues ou environ: où à present la plupart des marchands François vont charger leurs vaisseaux de Bresil, d'autant qu'un quintal de celui de la contree voisine de Port, vault plus que deux de l'autre. Vous trouuez au partir de là, les riuieres de saint François & saint Michel, à la mesme haulteur du goulfe de tous les Saints: puis apres venez au redouté Cap, & premier de tous
Cap de saint Augustin premier de tous.
les autres, saint Augustin: distant de la riuiere saint Michel, de quelques trente deux lieues, & de Port Real cinquante trois: gisant à troiscens cinquante degrez de longitude, huit degrez cinquante minutes de latitude. A quarante deux lieues de là, vous trouuez le Cap de Placel, & celui de saint Roch qui s'estand dans la mer quelques douze lieues: & fort redouté des mariniers, à cause des rochers qui l'environnent, & est distant de celui de Placel, quelques vingt cinq lieues, gisants en pareille eslevation, sçauoir sur les trois cens quarante huit degrez de longitude, & quatre degrez de latitude. Vous auez apres ceux de saint Nicolas, de Placelles, & de Corinthe, posez sur les trois cens quarante cinq degrez trente deux minutes de longitude, & deux de latitude, & celui des Esclaues en pareille haulteur Quant au